

AD TESTA-  
MENTVM D. IOAN-  
NIS BRENTII, NVPER CON-  
tra Zuínglianos publicatũ, RESPON-  
SIO brevis, necessaria, & modesta, à  
MINISTRIS ECCLESIAE TI-  
GVRIAE vniuersis fide-  
libus ad iudicandum  
proposita.

PSALMO 119.

*Obueniant mihi misericordia tua Iehoua: &  
salus tua secundum eloquium tuum: & responde-  
bo probris afficienti me, verbum: quod spero in  
verbo tuo. Et ne eripias de ore meo verbum veri-  
tatis vsquequaq;: quia iudicia tua expecto.*

TIGVRI

EXCVDEBAT CHRI. FRO-  
SCHOVERVS. M.D.LXXI.

1  
1

1  
1

g  
ra

to

fo

fa

v

q

ul

re

r

v

f

# D. IOANNIS BRENTII VERBA EX

TESTAMENTO IPSIVS DE

scripta, quibus hoc libello  
respondetur.

**P**ORRO singulariter ex intimo corde, expresse & nominatim reijcio & condemno, falsam & damnatā Zuinglianorum doctrinā, qui contra sacram scripturam, contra sensum verā & veteris ecclesiæ, & contra Augustanam confessionem docent atque scribunt, & asserere audent, verum corpus & sanguinem Domini nostri Iesu Christi, non esse vere & essentialiter præsens in Cæna Domini, quando illa ex ipsius instituto celebratur, neque illic cum pane & vino cunctis ore sumentibus tam dignis quàm indignis distribui.

Grauem verò hunc & intolerabilem errorem falsa interpretatione locorum sacra scripturæ tueri conantur, & dicunt, Christum ascendisse in calos, & maiestate sua, quam per unionem

personalem humanam naturam cum diuina accipit, esse in cælo corporato, & peculiari circumscriptoq; loco, neq; posse vel diuina omnipotentia vel vlla alia potentia corpore suo simul in duobus pluribusue aut omnibus etiam locis esse: & sedere ad dexteram Dei, quam Zuingliani sentiunt & interpretantur peculiarem quendam de finitumq; in cælo locum esse.

Hunc igitur sensum huius articuli fidei nostræ, Christus ascendit in cælos, & sedet ad dexteram Dei patris sui omnipotentis, prorsus Zuinglianum esse arbitror, hoc est priuatum, & absq; vlllo fundamento scripturæ confictum, erroneum, damnabilem, atque recto & vero intellectui personalis vnionis, vtriusque diuinæ & humanæ naturæ in Christo, qua exaltatus est super omne nomen, vt coram ipso flectatur omne genu in cælis, in terra & sub terra, prorsus contrarium & blasphemum,

Non dubito autem si Deo nobis propter hominum ingratitude irato Zuinglianorum doctrina in ecclesia vincat, fore, vt sicuti Arriani qui maiestatem diuinæ naturæ in Christo abnegarunt, orthodoxos crudeliter & tyrannice ferro



ce ferro persecuti sunt, ita similiter etiam Zuingliani, qui maiestatem humanae naturae qua propter personalem unionem Dei & hominis donata & ornata est, inuertunt & corrumpunt, orthodoxos latronum more persecuturi & oppressuri sint, quoniam spiritus mendacij idem homicidij quoque spiritus est.

Etsi autem nostra aetate quidam Zuinglianorum falsam suam doctrinam de Coena Domini Augustanae confessioni fucatis verbis inferere conantur, ac incipiunt similia cum recte sentientibus verba usurpare, quemadmodum etiam Arriani antequam vincerent erga orthodoxos, fecere: tamen quia eorum spiritus mendacij spiritus est, nulla illis habenda est fides, neque ulla fucata compositio cum illis facienda est, ne posteriora fiant peiora primis.

Quapropter queso per Dei gratiam omnes qui iuuare possunt, ut iuuent, & qui prohibere possunt prohibeant, ut Zuinglianorum spiritus in recta & vera Christi ecclesia sedem locumque nullum habeat.

Interea non aequum iudico Papatus & quo-

quendam aliorum tyrannidem, qui titulo Zuingliani erroris Sinceros Christianos à Zuingliani doctoribus seductos, neque melius edoctos, ferro persequuntur. Volo etiam quantum in me est his, qui à Zuingliano errore ad veram fidem ex animo Dei beneficio conuertuntur, ostium vite eternæ non esse occlusum

4

# AD TESTAMEN TVM D. IOANNIS

BRENTII BREVIS, NECES-

*saria, & modesta Responso Mi-*

*nistrorum Ecclesiæ*

*Tigurina.*



UPER admodū arte Chalcographi-  
ca Testamentum D. Ioannis Brentij  
publicatum est, quod ab illo è viuis ex  
cedente posteris relictum fuit: cæte-  
rum non minus vtile fuisset si illud æque ac reli-  
qua pars extremæ illius voluntatis suppressum  
& nunquam fuisset in publicum editum, ita e-  
nim charitati paciq; consultum erat, & expostu-  
lationes, lites atque offensiones pauciores essent.  
Quoniam verò illud omnino publicare quibus-  
dam visum est, & nominatim etiam contra Zui-  
ngianos editum fuit, nemo nobis vitio vertere  
debet, & defensionem non necessariam existi-  
mare, si nos quoque in lucem proferimus no-  
stram innocentiam doctrinamq; veram & Chri-  
stianam, quæ hoc scripto absque vlla iusta causa  
conuitijs proscinditur, ideoque apud simplices  
in suspicionem aliquam venire poterat. Alio-  
quin nos quidem non Zuingliani sed Christiani

## RESPONSIO AD

nominari volumus: nullius enim hominis quantumvis docti, pii seu sancti, & celebris nomen recipimus aut agnoscimus. Sed quia hoc Testamento doctrina illa quam beatæ memoriæ Zuin-  
glius in nostris ecclesijs bene recteq; proposuit, infense & ardentèr oppugnatur, & conuicijs afficitur, quamuis cuperemus cum omnibus quatenus salua religione fieri potest pacem seruare, & nulli hætenus ita nobiscum agendi vllam occasionem præbuerimus, cogimur tamē ecclesiarum quibus inseruimus, honorem nomenque quod hucusque Dei beneficio clarum habuere, ac simul sanam veramque doctrinam nostram defendere & conseruare. Quod verò ipsius Bren-  
tij personam spectat, eum qui obiit quiescere patiemur, neque cum mortuo luctabimur, misericordi iudicio Dei ipsum commendantes, tantum contra Testamenti calumnias nostram innocentiam proponemus & defendemus.

*Cenam Domini nostri Iesu Christi obscurari & implicari humanis additionibus, & pugnantibus atq; litigiosis verbis & phrasibus.*

**P**rimum omnium in hoc Testamento dicitur, falsam esse & damnatam doctrinam, grauem item & non ferendum errorem, si quis non confiteatur verum corpus & sanguinem domini nostri

nostri Iesu Christi vere & essentialiter præsens esse in cœna domini, & cum pane ac vino omnibus ore illud sumentibus distribui, siue digni sint, siue indigni.

Porro nos è contrario ab initio hætenus semper constanter aperteq; docuimus & scripsimus, & nunc quoq; docemus atq; scribimus, Cœnam sacrosanctam domini nostri Iesu Christi, additionibus humanis, & concertationum plenis disputationibus, & absurdis atq; pugnantibus locutionibus, obscurari & quasi intrinsecari, & ita factam esse ecclesiæ insuauem, molestam & litigiosam, cum tamen ita instituta sit à domino, vt in charitate & vnitæte ac cum summa lætitiâ in spiritu sancto, celebretur in commemorationem mortis acerbissimæ quam pertulit, & gratiarum actionem pr certissima nostra redemptione, & in obligationem vnius corporis, &c.

Cœnâ Christi  
si simplifica-  
ri humanis  
additionibus.

Humanum autem inuentum & additio est, quod dicitur panem & vinum cœnæ domini, essentialiter, hoc est corporaliter corpus & sanguinem Christi esse: ideoq; etiam essentialiter, hoc est corporaliter in cœna præsentiâ esse, & essentialiter siue corporaliter cum pane & vino sumi, tam ab indignis quam à dignis & credentibus. Quamuis enim dominus in sacra cœna panem sumens dixerit, Accipite, edite, hoc est corpus meum quod pro vobis traditur, mox tamen sub-

Essentialiter  
seu corporaliter.

## RESPONSIO AD

iunxit, Hoc facite in mei commemorationem. Instituit etiam, quod omnes absq; controuersia confitentur, sacramentum, quare eius verba sacramentaliter & in commemorationis rationem accipienda sunt, iuxta eum modum quo & ipsi suis in ecclesia semper adest, & quo corpus eius manducari potest & debet, nempe spiritualiter, non essentialiter aut corporaliter. Quare nomen essentialiter aut corporaliter non à Domino dictum est, sed ab hominibus verbis Domini additum contra naturam sacramentorum, & contra naturam & rationem percipiendi corpus Christi. Interea non ignoramus quo sensu in hac controuersia quidam viri boni & pacis studiosi uocula essentialiter seu substantialiter vsi sint, & quomodo eam explicarint: ac simul nouimus quam inique tulerint id ipsum alij: sed id nos nil mouet, & horum sententiam in medio relinquimus. Quæ autem sit essentia corporis Christi nemini obscurum est, idq; ex ipsis Domini verbis, quæ mox à resurrectione de corpore suo protulit, dicens, Spiritus carnem & ossa non habet prout me conspicitis habere. Videte, contrectate me, &c.

**Lucæ 24.**

**Non carnaliter neque effusiliter.**

Aiunt, corpus quidem Christi essentialiter in Cœna adesse, & corporaliter manducari, non tamen carnali aut aspectabili ratione. Itane vero? Si hoc modo se res habet vt nunc explicant, nulla erit

la erit amplius controuersia. Nam si hæc explicatio valet, posthac merito abijcienda erunt verba ab hominibus inserta & infarta, Essentialiter seu corporaliter. Certum enim notumq; est, id non esse corporeum quod proprietate corporis caret. Præterea cum dicitur corpus adesse & manducari essentialiter seu corporaliter: & mox additur, non carnaliter neq; visibiliter, manifestum est posterioribus verbis negari & aboleri quod prioribus dictum fuit: corporis enim proprietas est, vt supra intelleximus, carnem & ossa esse, tangi & cerni posse.

Rursus aiunt hæc omnia fieri ineffabili modo & ratione: Nos vero denuo respondemus, etiam hanc loquutionem absurdam pugnantemq; esse, & quæ seipsam subuertat. Nam qui dicit essentialiter & corporaliter, modum & rationem quomodo sit expressit, quare non amplius est ineffabilis: Si vero modum & rationem effari non possumus, verba essentialiter & corporaliter abijcienda sunt: quod si hæc verba retinere & obtrudere voluerint, modus est effabilis. Quare conficitur irrefragabiliter locutiones has inter se pugnare seq; mutuo euertere, quibus simplices inuoluuntur vt se in hac causa explicare & ceptum aliquid habere nequeant. Interea fatemur multa mysteria Dei ineffabilia esse, quemadmodum & D. Paul. 1. Cor. 2. ex propheticijs testimonijs loquitur de

Ineffabili  
modo &  
ratione.

## RESPONSIO AD

maiestate gloria & gaudio æternæ felicitatis; verum non eadem ratio ubiq; seruanda est, vbi firmis verisq; scripturæ testimonijs id non potest euinci, aut res ipsa verbo Dei explicata & dilucide exposita est. Vbi vero subsistere à Deo iubemur, & vltius indagare vetamur, ibi iure obediendum & quiescendum est.

*Qua ratione pacem adipisci possimus.*

Propterea vero hæc à nobis indicantur, vt omnes solide cognoscant, humanæ prudentiæ additionibus è salutari læta & pacifica domini cœna pomum Eridis factum esse, ac proprietatem & simplicitatem sacre institutionis, sacramentiq; naturam, obscuratam & concertationibus inuolutam esse, quare si pacem recuperare, & verum sensum retinere voluerimus, huiusmodi additiones & litigiosas concertationes omittere oportebit.

*Vocem essentialiter necessario receptam esse.*

Non ignoramus quid hoc loco nobis obijciatur, veteres coactos esse vt nomine essentiæ aut substantiæ contra Arrianos, ne illi in confitenda fide astute elaberentur, sed adigerentur ad veram essentiam Deitatis Christi confitendum: ita etiam aduersus Suermeros nomen essentialiter vrgendum esse. Cæterum hæc prorsus sunt dissimilia, nam vt cætera quæ in promptu sunt omitamus, alibi perspicue solideq; ostendimus, nomen essentiæ non ab hominibus excogitatum in hac contra Arrianos, controuersia: sed ex claris scripturis



scripturis prophetis & Apostolicis desumptū,  
& recte ad huius controuersię explicationem ad  
hibitum esse, neque in hac quæstione de diuini-  
tate Christi esse absurdum aut litigiosum verbū,  
sed quod optime conueniat & seruiat rei de qua  
agitur: Sed vti ex superioribus patet, nō eadem  
est ratio nominis essentialiter in causa Cœnæ  
domini.

Porro hoc quoque manifesta est additio, quod  
nono vocabulo ab illis dicitur, indignos quoque  
manducare & oraliter sumere corpus Christi:  
quod nunquam dominus aut eius Apostoli do-  
cuere, Corpus enim & sanguis Christi non e-  
duntur ore corporis, sed tantum sacramentum:  
Item corpus & sanguis Christi non sunt cibus  
qui orali manducatione in ventrem descendat,  
sicut alij cibi corporei: id enim ad contumeliam  
domini faceret, vt non obscure ex verbis ipsius  
Matth. 15. colligi potest. Præterea veteres ortho-  
doxum iudicarunt, & vnanimiter confessi sunt,  
corpus & sanguinem domini esse spirituales cibum  
& potum. Quin etiam corpus & sanguis  
Christi fidelibus sunt cibus & potus vitæ, infide-  
les autem vita carent, quemadmodum & fide per  
quam vita recipitur: quare etiam si hi sacramen-  
tum ore sumant, non tamen participes fiunt cor-  
poris & sanguinis domini, quæ sumpta vitæ non  
morti seruiunt. Nam quod aiunt, infideles cor-

Indignos  
oraliter e-  
dere cor-  
pus Christi

## RESPONSIO AD

Ioan. 6.

1. Cor. 11.

pus quidem Christi edere nō autem participare fructum eius, hoc est vitam : manifeste repugnat verbis Domini dicētis, *Qui me comederit viuet.* Ideoq; etiā Apostolus distincte locutus est, neq; dixit, *Qui corpus Christi indigne comede:* i: sed, quisquis ederit panem hunc indigne, damnationem sibi ipse edit, & reus tenebitur corporis & sanguinis Domini, propterea quod corpus Domini nō discernit neq; vera fide percipit: ac ideo etiam nō discernit & dijudicat singularem hunc & spiritualem cibum qui fide sumitur, à vulgaribus corporeis cibis qui ore sumuntur. Neq; aliter sensit & docuit vetus ecclesia Christi: D. enim Augustinus, diserte inquit, corpus Christi ab omnibus qui eius participes fuerint ad vitā sumi; à nullo ad exitium: sacramentum autem corporis & sanguinis Christi ad mortem sumi ab infidelibus. Tractatu in Ioannem 26.

*Simplex & perspicua doctrina de Cœna Domini, & de præsentia et manducatione corporis et sanguinis in Cœna Domini.*

**I**Am vero quo in grauissimo negotio Cœnæ Domini nihil nostrum nullaq; verba aut phrasēs à Domino & Apostolis non vsurpatas immisceamus, quæ forte secum pugnent & concertationum causam præbeant, sed vt verba Domini & simplicem eius institutionem seruemus, ita docemus de Cœna Domini: Institutam hanc esse à Domino

Simplex  
confessio  
de Cœna  
Domini.

Domino ad gratiarum actionem & commemorationem mortis suæ, quam ad redemptionem nostri semel obiit: huic Cœnæ suæ quando iuxta ipsius verbum à fidelibus peragitur, Dominum sicut promisit præsentem adesse, & in fidelibus operari seu efficacem esse, & hos verum eius corpus & sanguinẽ edere ac bibere, eo modo quẽ ipse dixit & explicauit. nempe spiritualiter, per fidem, ad vitam æternam: porro indignos siue infideles sumere panem & poculum Domini sibi ipsis ad iudicium & condemnationem.

Ex his quæ protulimus cuius apertũ est, nos nihil de nostro commiscuisse, sed simpliciter retinere ipsa Domini verba, institutionem & expositionẽ in euangelicis & apostolicis scriptis traditã.

Sacramẽta vero vt Baptismus & Cœna Domini ab ipso Seruatore nostro hac ratione instituta sunt, vt vna cũ verbo duo in illis sint consideranda, signũ & res signata: & de hoc nulla est neq; vnquã fuit cõtrouersia. Signũ externũ quiddã est & visibile, veluti in Baptismo aqua, quæ affunditur in nomine Patris Filij & spiritus sancti: in Cœna Domini panis & vinũ, quæ frangũtur, effunduntur, & sumũtur. Signatũ vero internũ quiddã est quod oculis fidei cernitur, vt in Baptismo, regeneratio, remissio aut emũdatio peccatorũ, itẽ recipi & quasi incorporari seu inseri populo Dei: in Cœna, verũ corpus & sanguis D. nostri Iesu Christi,

Matt. 26.  
Ioan. 6.  
1. Cor. 11.  
Institutio  
Sacramen-  
torum.

## RESPONSIO AD

Dominus  
in cœna  
præfens  
adest.

quæ ille morti tradidit & effudit, in remissionem peccatorum nostrorum & acquisitionem vitæ æternæ. Cœnæ huic dominus ipse in cœtu fidelium præfens adest spiritu suo, gratia item & efficaci operatione, quemadmodum semper sacramentis suis præfens adfuit seq; præsentem fore promissit. Manducationis autem veri corporis & sanguinis domini in cœna hæc ratio est: quicunque fidelium corda sua in cœlos extollunt, & in ecclesia vera fide ad cœnam domini accedunt, ut considerent ipsius mortem, in qua corpus suum tradidit & sanguinem suum effudit pro nostra redemptione (hic enim præcipuus finis est cœnæ domini, quandoquidem & dominus ipse bis dixit, Hoc facite in mei commemorationem) & ut propterea gratias agant domino: hi ore quidem percipiunt signum seu sacramentum corporis & sanguinis domini, panem nempe & vinum externe atq; visibiliter, verum non hæc sola accipiunt, neque etiam nihil aliud quam panem & vinum ut alioqui in corporali cibo & potu sumunt, sed animi eorum interius per fidem accipiunt rem signatam, nempe verum corpus & sanguinem Christi, verum hoc modo & forma quam dominus ipse verbo suo exposuit, scilicet spiritualiter, ita ut verum corpus & verus sanguis Christi sedens ad dexteram Dei, non corporaliter sit cibus ventris, & dentibus atteratur, sicuti signum seu sacramen-

sacramentum atteritur, sed fide recipiatur ad vitam. Nam duntaxat vera fide neq; præterea vlla alia ratione Christum sumimus & percipimus, qui passionem suam peccatorum remissionem & vitam æternam impetrauit: fidei autem virtus per Spiritum sanctum efficit in fidelibus vt viuant, & certo statuunt se ab omnibus suis peccatis mundatos esse. Hac igitur ratione dominus noster nominatur & est cibus & potus vitæ: nam vt corporeus cibus & potus sumpta, hominem in præsentī vita sustentant: ita si vera fide edamus & bibamus, hoc est recipiamus dominū Iesum, credentes quod eius sanguis pro nobis fusus sit, & se tradiderit pro nostra mundatione & vita, noster est cibus & potus, nos emundat & conseruat ad vitam æternam. Eadem quoq; ratione in nobis manet & viuit, nosq; vicissim in ipso manemus & viuimus.

Eodem modo Christus in Euangelio Ioannis aperte inquit se esse panem illum vitæ: item, panem quem daturus sit esse carnem suam, quam daturus sit ipse pro vita mundi: & qui ederit panem hunc victurum in æternum. Cum vero auditores eius dicerent, Quomodo potest hic nobis carnem suam dare qua vescamur? edocet eos non esse aliam rationem perueniendi in vitam, quam si comederint carnem suam & biberint sanguinem suum, quoniam hæc sola sint cibus & po-

Ioan. 6.  
Quomodo  
care Chris-  
ti sit noster  
cibus.

## RESPONSIO AD

tus ad vitam æternā, extra quæ vita nulla est nec inuenitur. Porro cum auditores eius hoc sermone tanquam duro & inhumano offenderentur, quasi exigat vt humana carne vescamur & sanguinem bibamus, ita enim perperam intelligebant, seipsum postea interpretatur, ac dicit illis, se in cœlos ascensurum esse, vnde maiestatem & gloriam eius cognoscere possint, & quod non falso illis polliceatur vitam, cum sit filius Dei. Præterea vult eos ex ascensione sua discere, se ab hominibus non edi aut consumi corporaliter, quandoquidem totus corporaliter in cœlos ascendat. Item carnem corporaliter manducatam, quemadmodum ipsi sentiebant manducandam, nihil prodesse ad vitam: sed morti traditam, & spiritaliter fide perceptam, vitam afferre. Spiritum namque esse qui viuificet, & verba quæ ipse loquatur illis de comedenda carne sua, & bibendo sanguine suo, spiritum esse & vitam. Initio etiam huius sermonis, vt clare explicaret quomodo panis vita sit, & recte ad vitam sumatur, aperte dixit, Ego sum panis ille vitæ: qui venit ad me nequaquam esuriet: & qui credit in me non sitiet vnquam. Vbi pro Edere ponit, venire ad ipsam. Rursus etiam inquit, Nemo venit ad me nisi Pater meus traxerit eum: hoc est, nemo credit in me, nisi Pater meus illi in cor inferuerit fidem per spiritum suum. Clarius adhuc inquit. Qui credit in me non

Non sitiet vnquam: vbi aperte Credere pro bibere ponitur: quare edere & bibere nihil aliud est quam credere. Quare ex verbis Domini perspicue cognoscitur spirituales manducatione Domini, siue corporis eius, non alia ratione quam per solam fidem fieri.

*Sextum caput Euangelij Ioannis recte adhiberi ad expositionem Cœnæ Domini.*

**Q**Uæ proxime è sexto capite Euangelij D. Ioannis protulimus, ad explicandum veram & salutarem manducatione corporis & sanguinis Domini nostri Iesu Christi in sacra Cœna, quidam quod non ignoramus, reiiciunt, dicentes, Dominum Ioannis 6. capite notum locutum esse de ea manducatione corporis & sanguinis sui quam postea in vltima Cœna instituit: nam cum Capernaumi de cibo & potu corporis & sanguinis sui concionaretur, Cœnam sacram nondum institutam fuisse: præterea Cœnam Domini longe aliam actionem & manducationem esse ab illa quæ Ioannis 6. capite exposita est.

His vero qui talia obijciunt libenter damus, Cœnam Domini nondum fuisse institutam, quando Christus Capernaumi eam concionem habuit quæ Ioan. 6. cap. descripta est: item Matth. 26. capite quædam alia, & plura his quæ Ioannis 6. habentur, à Domino instituta esse. Etenim verbo suo

Quid præter ea quæ Ioan. 6. habentur. Matth. 26. Dominus instituerit.

## RESPONSIO AD

addidit sacramentalē actionē, ad conseruandam in recenti memoria passionem & mortem quam causa redemptionis nostræ sustinuit: instituenti scilicet vt ecclesia fidelium in vnum conueniat, & panem simul frangat, & potum accipiat, quem admodum dominus iussit facere ad commemorationem mortis suæ & nostræ redemptionis: & interea etiam simul dominum laudet & celebret vera gratiarum actione: & confessione fidei suæ, & obligatione in vnum corpus ecclesiæ Christi: cuncta enim hæc confitetur re ipsa & facto in vfu sacrę Cene. Nam vti supra exposuimus, & nemo vnquā in controuersia vocauit duo in sacramentis consideranda sunt, sacra signa, siue externa & visibilis actio à Deo instituta: deinde res sacra signata, quā actio hæc operatione spiritus sancti renouat & recenti in memoria conseruat, imo sustentat recte vtentes. Signū igitur siue actio Cene domini non est instituta Ioan. 6 sed Mat. 26. c.

Ceterum quod ad rem signatam spectat, nempe corpus traditum & sanguinē effusum, passionem & mortem Christi, per quæ viuificantur credentes, hæc inquam non alia sunt in actione Cene quam illa de quibus dominus Ioannis 6. locutus est. Vnica enim tantū est redemptio: ac vnum duntaxat corpus dominus noster habet, ex Maria virgine assumptum, quod ante & post Cene institutionem, in Cœna & extra eam, semper vpi  
cum



eum corpus manet (institutio enim sacramenti nihil in corpore Christi mutat) & suam naturam ac proprietatem seruat, ideoq; sicuti ipse quoque aperte testatur, corporaliter manducatum non prodest. Cum autē Dominus Cœnam suā Matt. 26. institueret proculdubio firma memoria complectebatur ea quæ Ioan. 6. dixerat, ideoque credendum est eum nihil postea instituisse, quod vnicæ suæ doctrinæ antea propositæ aduersaretur, neq; ecclesiæ suæ commendasse aut tradidisse id quod antea testatus fuerat nihil prodesse. Quapropter verum est expositionem à Domino Ioannis 6. capite factam, de manducatione & potu corporis & sanguinis sui, optime inseruire explanationi Cœnæ quam Dominus Mat. 26. instituit.

*Doctrina nostra non est noua, neq; contraria diuinis literis, & sententiæ orthodoxæ veteris ecclesiæ.*

**D**Octrina nostra hætenus exposita de præsentia Christi in ecclesia & apud credentes, deq; manducatione & potu veri corporis & sanguinis eius in sacra Cœna, non nostra tantum sententia est, aut noua & à nobis excogitata, neque aduersatur sacris literis, & sententiæ orthodoxæ veteris ecclesiæ, quemadmodum testamento Brentij asseritur. Id enim quod docemus, ex scripturis sacris, vt supra ostensum est, didicimus. Christus etiam qui in vltima Cœna panē ac po-

## RESPONSIO AD

*Christus non  
est corpora  
liter fidelis  
bus præsens  
(in) ecclesia.*

*Ioan. 17.  
Ioan. 16.*

*Ioan. 14. 16.*

culum discipulis porrigens dixit, Accipite, editis, hoc est corpus meum, hic est sanguis meus, multo vehementioribus & clarioribus verbis seipsum explicauit, ac ostendit se non fore corpore suo fidelibus in ecclesia corporaliter præsentem, dicens, Non sum amplius in mundo, sed hi sunt in mundo, & ego ad te venio. Item, Exiui à Patre & veni in mundum: iterum relinquo mundum & proficiscor ad Patrem. Rursus, Sed ego veritatem dico vobis, expedit vobis ut ego abeam, nisi enim abiero Consolator ille non veniet ad vos: sin autem profectus fuero, mittam eum ad vos. Item, Non relinquam vos orbos &c. Ego autem rogabo Patrem, & alium Consolatorem dabit vobis, ut maneat vobiscum in æternum; nempe spiritum illum veritatis. His omnibus sententijs Dominus ecclesiam suam clarissime docuit, se deinceps post ascensionem suam non amplius corporaliter sed spiritualiter in ecclesia habitaturum. Quare non absque ratione, neque contra Domini doctrinam omittimus in hac causa nomina Essentialiter & Corporaliter, quod ab ipso Domino exclusa sint, utimur autem nomine spiritualiter, utpote quod ex ore Domini & tot eius claris testimonijs desumptum sit.

Præterea vetus & orthodoxa ecclesia, non aliam sententiam de Cœna Domini quam hanc nostram ab ipsa usque Apostolorum ætate habuit. Diuum

um enim Aurelium Augustinum omnes ortho-  
doxum doctorem & episcopum agnoscunt, is in  
libris suis non tradit propriam & peculiarē quan-  
dam suam fidem, sed communem & catholicā fi-  
dem, in ecclesia suæ ætatis receptam; nunquā ve-  
ro à quoquā reprehensus est quod de Cœna Do-  
mini non recte & Christianè senserit atq; scripse-  
rit: is tamen aperte eadem nobiscū de Cœna Do-  
mini professus est. Primū in Sacramētis vna cum  
verbo Dei duo consideranda esse, signum & rem  
signatam. Deinde hanc esse consuetudinem sacra-  
rum literarum vt signis tribuant nomen rerū si-  
gnatarum; atq; ita in Cœna Domini panem & vi-  
num nominari corpus & sanguinem Christi: dili-  
genter vērō hic cauendū esse, ne propterea signū  
accipiamus pro re signata: esse enim hanc miso-  
ram animorum seruitutē. Tertio scripturā sicuti  
de Sacramentis sacramentaliter loquitur, ita etiā  
sacramentaliter & figurate intelligendam esse.

Quare etiam Augustinus ipse verba hæc, Hoc est  
est corpus meū, hic est sanguis meus, figurata esse  
fatetur: & connumerat verbis Pauli, Petra autem  
erat Christus: Interpretatur autem ea hoc modo,  
panem & vinum significare corpus & sangui-  
nem Christi: siue (vt etiam alij veterum lo-  
cuti sunt) panem & vinum esse signa, figu-  
ram, symbola & sacramenta corporis & sangui-  
nis Christi. Quod si quis verbis nostris credere

Augustinus  
orthodo-  
xus eccle-  
siæ doctores

Hoc est corpus  
meum.

Rom. 9. 33.

Psalm. 116.

Act. 4.

## RESPONSIO AD

noluerit legat August. De doct. Christ. lib. 3. cap. 5. 8. 9. Itē, Quæst. lib. 3. in Leuit. Quæst. 57. In Psal. 3. Contra Adimantum cap. 12. Epist. 23. &c.

Quarto idem Augustinus differens de præsencia Christi in ecclesia fidelium aperte dicit, Christum post ascensionē suam in cœlos non esse corporaliter in ecclesia præsentem, sed spiritualiter. Si quis ipsius verba cognoscere cupit legat in Ioannis Euangelium tractatū 50. & 106. vbi disertè ait hanc doctrinam esse orthodoxam, & hanc esse veram & rectam fidem ecclesiæ Christi.

Quinto aperte dicit corpus & sanguinē Christi non edi & bibi corporaliter ore, sed spiritualiter per fidem. Imo libere dicit, si verba Christi, Nisi comederitis carnē filij hominis, &c. Ioan. 6. iuxta literam & non figurate accipiantur, facinus vel flagitium committi. Atq; sicuti cæteri Patres omnes, ex sexto capite Ioannis interpretatur negotium Cœnæ dominicæ, quomodo verum corpus & verus sanguis Christi edatur & bibatur: ideoq; Ioannem ait nihil in suo Euangelio, vt cæteri Euangelistæ fecerunt, de Cœnâ Domini scripsisse, siue de manducatione corporis & sanguinis Christi, propterea quod hæc alibi exposuisset. Quod si quis dubitat & meis verbis fidem habere noluerit, legat August. De doct. Christ. lib. 3. cap. 10. &c. Tractatu in Ioannem 25. & 26. & De Consensu Evangelistarum lib. 3. cap. 1.

Sexto

Sexto docet idem sæpe nominatus pater, indignos siue infideles edere quidem & bibere sacramentum corporis & sanguinis Christi, ideoque mortis Christi propter indignitatem fidei suæ reos fieri, non tamen percipere ipsum corpus & sanguinem Christi, quæ duntaxat ad vitam & non ad exitium sumuntur. Ita Iudam comedisse panem domini, sed non panem dominum ipsum in vltima cœna edisse, idq; illi exitio fuisse, quemadmodum cæteri Apostoli qui panem vitæ dominum ipsum manducarunt, vitam acceperunt. Cui libuerit legat Augustinum Tractatu in Ioannem 26. 59. 62. & De Ciuitate Dei lib. 21. cap. 25.

Atq; hæc quidem quanta fieri potuit breuitate commemorauimus vt omnibus manifestum fiat quam iniuste hoc Testamento accusemur; doctrinam nostram de cœna domini repugnare sententiæ veteris orthodoxæ ecclesiæ; Dei enim beneficio, veris rationibus contrarium euicimus. Quare conuicia Testamenti huius, doctrinam scilicet nostram falsam & damnatam esse, & errorem grauem ac intolerabilem, iusto iudici committimus: Scimus enim si nostra doctrina talis esset qualem illi calumniantur, necessario quoq; veteris ecclesiæ doctrinam talem fore: quod tamen falsum est: recte enim illi & nos quoq; cum eis docent. Quare nos ipsos consolamur verbis

## RESPONSIO AD

his domini, Beati eritis quum conuitiati fuerint vobis homines, & dixerint quiduis mali aduersus vos, mentientes propter me.

*De vera interpretatione scripturarum  
& corporali ascensione Christi in celos.*

**G**rauius postea & acerbius in hoc Testamento accusamur, quod falsam nostram doctrinam de Cœna Domini defendere conemur falsa interpretatione scripturarum, ac dicamus Christum ascendisse in cœlos, & iuxta maiestatem suam, quam personali vnione humanæ naturæ cum diuina accepit, esse in cœlo corporeo & peculiari quodam atque definito loco, neque posse vel per Dei omnipotentiam, vel vlla alia vi & potentia corpore suo simul in duobus vel pluribus aut omnibus locis esse: sedere vero ad dexteram Dei, quam nos peculiarem & definitum cœli locum interpretemur. Omnia autem hæc absque vlllo testimonio sacræ scripturæ conficta esse, & erronea atque damanda.

*De vera interpretatione  
sacrarum  
scripturarum.*

Ad grauem hanc attamen iniquam & nullis rationibus subnixam accusationem, ita simpliciter respondemus. Nos hætenus sacræ scripturæ sententias semper religiose tractauimus inuocata Dei gratia, atque illas declarare & interpretari

pari studuimus, non autem falsis interpretationibus peruertere & corrumpere. Nam hætenus semper iudicauimus hanc esse veram & legitimam scripturarum interpretationem, vbi nihil profertur contrarium gloriæ omnipotentis Dei, ei inquam gloriæ quam sibi vendicat, nihil item pugnans veræ fidei, & articulis Symboli Apostolici, nihil denique aduersum charitati Dei & proximi: atque vbi sensus ex ipsa scriptura sumitur, non ex humano affectu inferatur: proprietas linguæ cuiusque seruatur: occasiones & ea quæ antecedunt & consequuntur, cæteraque adiuncta diligenter expenduntur: & sensus etiam seruatur aliorum scripturæ testimoniorum, quæ vel dissentire videntur, vel etiam clarius de eadem re loquuntur. Neque aliter veteres & orthodoxi Patres de scripturarum interpretatione docuerunt: id quod ex libris eorum constat, & præsertim D. Augustini de Doctrina Christiana.

Quapropter si quid à nobis contra cōmemoratas regulas cōmissum est, audire cupimus vbi & qua nam in re peccauerimus. Quia tamen in Testamento hoc nominatim nobis obijcitur ascensio Christi in cœlos, quasi loca in quibus eius sit mentio corruerimus, primū breuiter commemorabimus quidnā de ascensione Christi doceamus; deinde ad reliqua capita quæ cōmemoratur

## RESPONSIO AD

respondebimus, & Dei beneficia demonstrabimus nos nulla falsa scripturarum interpretatione uti, neque in reliquis capitibus quicquam novum à nobis proponi, & de quo non idem nobiscum docuerit vetus & orthodoxa Christi ecclesia.

De ascensione  
Christi.

De ascensione igitur Christi in cœlos hætenus ita semper docuimus, & docemus, dominum nostrum Iesum Christum vero suo corpore humano quod ex beata & intemerata virgine assumpsit, & in quo crucifixus & mortuus est, ac tercio die à mortuis resurrexit, mundum hunc & præsens seculum deseruisse, & à terris in altum, in cœlum ipsum ascendisse, ideoque non iam hic inferius corporaliter in terris esse. Ita namq; docet nos articulus fidei nostræ, Ascendit in cœlos: eodẽ modo nos credere docent sacræ literæ in Euangelij & Actis Apostolorum, his verbis: Dominus igitur cum benediceret eis disiunctus est ab eis, sursumq; ferebatur aspicientibus ipsis: & nubes susceptum eum abstulit ab oculis eorum. Verum ne quisquam existimaret eum in nubibus mansisse, sicuti quidam hæreticorum senserunt, à Luca additur & id Marcus quoq; testatur, eum cum sursum ferebatur in cœlum receptum esse. Observandum autem est quod scribunt receptum in cœlum. Quinetiam Angeli apparuere cum dominus ascendisset, & Apostolis qui intentis in cœlum

Luc. 24. 51.  
Marc. 16. 19.  
Act. 1. 9.



cælum oculis attoniti quodammodo erant, dixerunt, Viri Galilæi quid statis intuentes in cælum: hic Iesus qui sursum receptus est à vobis, ita veniet quemadmodum conspexistis eum proficiscentem in cælum. Acto. 1. & Marc. 16.

Quod si hac occasione testimonij angelici, in scripturis quæsiuerimus quando & quomodo Christus venturus sit, instruet nos articulus fidei nostræ, Inde (à cælis & dextera Dei) venturus est ad iudicandū viuos & mortuos. Paulus quoq; ad Thessalonicenses dominū de cælo venturum inquit in nubibus ad iudicandum, cum hortatu & voce tubæ archangeli: deinde fideles transformatos & qui à mortuis resurrexerint, rapiendos in nubes in occursum domini in aera, & cum domino recipiendos in æternā felicitatem. Ex his omnibus rationibus firmis & immobilibus, conficitur verum corpus domini nostri Iesu Christi ad cælos ascendisse, & in cælo habitare, vt non amplius corporaliter descendat donec iudicaturus est viuos & mortuos, tum enim corporaliter & visibiliter se conspiciendum exhibebit, Angelo testante, Ita veniet quemadmodum conspexistis eum proficiscentem in cælum: & domino ipso dicente, Videbunt filium hominis venientem in nubibus cæli, cum virtute & ingenti gloria. De eodem quoq; aduentu scriptum est, Videbunt eum in quem pupugerunt.

## RESPONSIO AD

Eodem modo Pates orthodoxi articulum de ascensione Christi & eius aduentu ad iudicium, intellexerunt, atque diserte scripserunt, Dominum ascensione sua reliquisse mundum, ita ut usque ad extremum iudicium non amplius corporaliter adsit in ecclesia, spiritu tamen & diuina sua virtute præsens sit ad finem usque mundi. Quod si quis hæc in ipsis Patribus inspicere cupit, legat ea quæ Cyprianus & Augustinus in Symbolum scripsere: ac rursus Augustinum Tractatu in Ioan. 21. 94. 102. 106. 155. De agone Christi. cap. 24. 25. De Ciuitate Dei lib. 12. cap. 4. Cyrillum lib. in Ioan. 10. cap. 38. & lib. 11. cap. 21. & 22. Quibus alios complures adiungere possemus.

Si vero nihilominus quidam volunt corpus Christi hic in terris corporaliter præsens habere; nemo tam exigui iudicij erit qui non animaduertere possit, hos irrefragabilibus testimonijs veritatis ante productis repugnare. Quis vero nos veritate adeo manifeste cognita arguet quod scripturas corrumpamus? Tum potius falsi damnari possemus si ex ascensione Christi faceremus disparitionem quandam, non corporalem discessum: aut si doceremus Christi corpus ascensione in cælos deificatum non amplius corporatum esse: quemadmodum nonnulli perperam de eo loquuntur: contra quos vniuersa scriptura & omnes Patres clare testantur, corpus Christi in gloria & maiestate

maiestate, seruare nihilominus proprietatem & formam veri corporis. Qui vero de hoc dubitat legat Augustinum Tractatu in Iohannem 22. 40. & III.

Corpus Christi in gloria proprietatem & formam suā seruat, Corpus Christi inuisibiliter præsens est.

Cæterum quod nonnulli obijciunt corpus Christi quod ascendit & nunc est in gloria, vere præsens esse ecclesiæ suæ, non tamen visibiliter sed inuisibiliter: id ipsum naturæ & proprietati veri corporis prorsus repugnat. Porro quod aiunt essentialiter & corporaliter præsens esse non tamen visibiliter, perinde est ac si quis dicat lucernam lucere sed absque lumine: ignem arde- re sed absque calore: aquam fluere, non tamen humidam & fluxam esse: hæc enim sunt mera so- phismata & latebræ hominum qui non student simplici veritati, sed rixis & tenebris. Si dominus ecclesiæ suæ inuisibiliter adest, cur non contem- ti sunt nomine spiritualis, cur ab illo tantopere abhorrent.

*De cælo beatorum sede in quod Christus Dominus ascendit, id esse certum lo- cum à Deo beatis destinatum, neque v- bique esse.*

**Q**uod vero cælum spectat in quod Chri- stus dominus ascendit, de eo ita vt sem- per & perpetuo receptum fuit simpliciter loqui- mur, cælum illud supra nos in alto esse, certum

## RESPONSIO AD

Christus a-  
scendit su-  
per omnes  
cœlos.

Psal. 101.  
Hebr. 1.

locum à Deo definitum destinatum æternæ bea-  
tæq; habitationi Christi & electorum eius. Dici-  
tur quidem in scripturis Christum ascendisse su-  
per omnes cœlos, alibi tamē scribitur, receptum  
esse in cœlum, vt supra ostendimus. Quare supra  
omnes cœlos inferiores & visibiles (de quibus  
Propheta & Apostolus dixere, Cœli sunt opus  
manuum tuarum, illi transibunt, tu autem ma-  
nes, &c.) ascendit in supremum cœlum quietis  
& felicitatis æternæ.

Act. 3. 21.

Hebr. 9. 24.

De hoc igitur cœlo & Christi habitatione in  
cœlis D. Petrus dixit: Christum oportuit cœlum  
accipere (aut vt alij interpretantur, cœlo capi)  
vsq; ad tempora restitutionis omnium, quæ præ-  
dixit Deus per os omnium sanctorum suorum à  
seculo Prophetarum. Similiter D. Paulus scri-  
bit, Non enim in manufactum sacrarium ingres-  
sus est Christus, quod sit exemplar vero respon-  
dens: sed in ipsum cœlum, vt appareat nunc in  
conspectu Dei pro nobis. Ac paulo post similiter  
D. Petro, de Christi habitatione in cœlis ad no-  
uissimum vsq; diem, in hæc verba scribit, Et si-  
cut illud statutum est hominibus vt semel mo-  
riantur, postea verò iudicium: ita & Christus se-  
mel oblatus (occisus) est, vt multorum peccata  
tolleret, altera vice absq; peccato conspicietur ijs  
qui ipsum expectant ad salutem. Hæc testimonia  
duorum Apostolorū Petri & Pauli clariora sunt  
quam

quam ut vlla interpretatione opus habeant.

Cælum esse  
locū certū.

Cælum igitur Domini nostri Iesu Christi peculiarem & certum definitumq; locum esse dicimus, quoniam scriptura id nobis ostendit superius in alto, non inferne in terris, multo minus apud inferos sub terra, aut etiam ubiq; Christus etiam quotiescunque oravit & oculos in cælum sustulit sursum aspexit non deorsum. Nos quoque quando oramus sursum in cælos corda & oculos nostros attollimus, non in omnia ubiq; loca. Præterea cum Christus in cælos ascenderet sursum ferebatur (ut supra ostendimus) & nubes quæ supra nos sunt abstulerunt eum à conspectu discipulorum: ipsi quoque discipuli cælum intuebantur quod supra non pone ante aut retro illos erat. Quamobrem dicimus cælum beatorum esse certum & à Deo definitum locum, in quem omnes electi cum Christo colliguntur, & cum eo in perpetua felicitate habitant.

Joan. 17. 21.  
11. 41.

Porro nostram sententiam præter commemoratas rationes clara verba Christi cælorum domini confirmant, quibus aperte cælum locum nominat. Nam in Euangelio Iohannis inquit, In domo patris mei habitationes multe sunt: alioqui dixissem vobis. Proficiscor paraturus vobis locum. Et quum profectus fuero & parauro vobis locum rursum veniam, & assumam vos ad me ipsum: ut ubi sum ego, illic & vos sitis.

Dominus  
cælum beatorum locū  
nominat.  
Ioan. 14. 2.

## RESPONSIO AD

Cum autem Dominus hæc verba de cœlo dicat, & illud habitationem & locum bis nominet, & Vbi & Illic quæ certi loci sunt voculæ, v. surpet, constanter retinemus ipsius Domini verba: ipse enim optime omnium nouit, num cœlum habitatio & certus locus sit nec ne, neque pudet nos cum cœlorum Domino, cœlum habitationem & locum nominare. Præsertim cum etiam Paulus dicat, *dominus noster* nostrum in cœlis esse, vnde etiam seruatorem expectamus Dominum Christum. Quod si cœlum locus est, vt Christus ipse testatur, certe non poterit vbique esse. Id ipsum etiam facile intelligi potest ex verbis, è terra in cœlum ascendere, item è cœlo descendere in nubes ad iudicium. Nam si cœlum vbique esset, nullo opus esset ascensu aut descensu, cum antea vbique in cœlo cuncta essent, vbicunq; tandem essent, quare non opus foret vt in illud ascenderetur.

Philip. 3.

Quæ fuerit  
mentem &  
maiorum no-  
strorum sen-  
sentia de  
cœlo.

Quinetiam maiores nostri & omnes ortho-  
doxi hanc sententiam quæ cœlum certum  
esse locum negat nunquam in animum indu-  
xerunt, sed corda sua in cœlos sursum sustule-  
runt, non deorsum aut antrorsum aut retror-  
sum, aut in latus. Similiter illi constanter & re-  
cte crediderunt animos suos separatos à cor-  
pore, recipiendos in cœlum cum Christo &  
cunctis fidelibus: corpora quoque sua mortua  
& se-

se sepulta, extremo die à mortuis suscitanda,  
 Domino obuiam in nubes & aera rapienda, vt  
 cum eo ferantur in locum æternæ beatitudinis,  
 quem præparauit omnibus diligentibus se. At-  
 que hæc est vera vetus orthodoxa & indubitata  
 fides, à qua fideles sese abduci non patiuntur ad  
 cælum aliquod vbiuetarium, quod simplices  
 vbi nam sit & vbi illud quærere debeant igno-  
 rant.

*Nota do-  
 ctina de  
 celo.*

Quod autem nostra ætate & in controuersia  
 de Cœna Domini asseritur, cælum beatorum  
 non esse definitum & circumscriptum locum  
 sursum in alto, sed cælum vbiq̃ue esse, cum in o-  
 mnibus terræ locis, tum etiam in inferno sub ter-  
 ra, ac etiam diabolos in hoc cælo esse, nouum  
 prorsus & tetrum dogma est, horrendum audi-  
 tu, quo simplices homines grauitèr inuoluun-  
 tur & perturbantur, vt nesciant cum sibi mori-  
 endum fuerit quoniam peruenturi sint, si cælum  
 nullus certus locus est. Dolet autem nobis ex a-  
 nimo tam absurda dogmata vnquam fuisse pro-  
 posita & controuersa. Quod si homines labore  
 & studio tanto docuissent, Christum in cœlis  
 vbi à patre collocatus est vero suo corpore ad  
 consolationem & salutem nostram quærere,  
 quantum studuerunt verum eius corpus, dedu-  
 cere in panem, aut cum pane coniungere, quo  
 tamen loco à Patre non est collocatum, non o-

## RESPONSIO AD

pus fuisset hoc commento vbiquitatis, & ridiculo illo atque absurdo cœlo infernali: multa etiam graua scandala infirmorum, & hostium nostrorum ludibria potuissent cauere. Verum hæc sunt præmia insuperabilis studij concertandi & litigandi in causa adeo simplici & aperta.

*Cœlum nō  
est locus ter-  
restis sed  
cœlestis.*

Cæterum à quibusdam improbe simplex nostra doctrina inuertitur, qui nobis, vt & præsens Testamentum facit, obijciunt, fingere nos corporeum Chiliastarum aut Machumetanorum cœlum, in quo beati quemadmodum in his terris corporeas habitationes & distincta domicilia habeant. Quærunt igitur si Christum in tali cœlo habitare oporteat, an coactus & cœlo captus ac quasi vinctus degat, sedeat, stet, iaceat, obambulet etiam, an semper in vno loco ipsum esse & manere oporteat, &c. Verum hæc à nobis dudum confutata sunt, si tantum æquæ responsio aliquem apud illos locum haberet: ac tum inter alia diximus, cogitationes & sermones huiusmodi petulantes, leues & impios, qui grauiter simplices homines offendunt, nulla occasione iusta nostræ doctrinæ impingi aut ex ea consequi. Quamuis enim cum scripturis cœlum nominamus certum locum felicitatis, eumque sursum non deorsum in terris, neque etiam vbique, sed eo in loco quem Deus æternæ felicitati destinauit atque definiuit, tamen ita de cœlo



cælo verba facimus, sicuti merito sentire & loqui oportet de negocijs felicitatis nostræ, exemptis ab huius miseræ vitæ conditione. Dicimus itaque cælum beatorum non esse terrenum sed cœlestem locum, conuenientem & idoneum mentibus à corpore separatis, & corporibus etiam clarificatis, quæ libera sunt à corruptione, & carnalibus præsentis vitæ affectibus, defectibus item & miserijs: nihilominus tamen cælum hoc manet certus & finitus & à Deo circumscriptus locus, suam cœlestem naturam & proprietatem habens. Quare non opus est vt solliciti simus & quæramus, quomodo habitationes sint distinctæ, & quæcunque alia huius generis curiosæ non necessariæ atque etiam inutiles quæstiones proponuntur. Dominus enim cum suis iuxta naturam clarificatorum corporum, quæ nihilominus vera corpora sunt, ab omni tamen corruptione exempta, liberrime in cælo degit ab omni coactione liber. Ideoque non tantum (vt ludicre imo petulanter nobis obijcitur) semper ipsum stare aut sedere aut ambulare aut iacere oportet, sed degit quomodo vult, & quo loco cæli vult, eo modo & ratione qui æternæ vitæ & naturæ ac proprietati clarificatorum corporum congruit: his nos contentos esse decet neque vltius quærere & curiose scrutari oportet, sicuti etiam Dignus Augustinus

Cælum esse  
liberrimū  
locum.

## RESPONSIO AD

docet, sufficere ut credamus Christum esse in caelis, neque quaerendum esse ubi aut quomodo in caelo sit, vel quid illic agat, &c.

*Christus nō  
est in cœlo  
quasi alliga-  
tus*

Similiter Dominum nusquā cœlo alligamus, neque quasi in carcerem includimus, quemadmodum etiam beatæ mentes fidelium separata à suis corporibus, & post resurrectionem à mortuis corpora clarificata in cœlos assumpta non quasi in carcere & captiva sunt. Præterea scriptura aperte dicit, corpus Christi non in terra sed in cœlo esse, nūm propterea scripturæ impingemus quod Christum cœlo alliget? Certum enim est cœlum non esse carcerem, & angustiae ac captiuitatis locum, sed locum libertatis, felicitatis æternæ, & ineffabilis gaudij.

*Quomodo  
Christum  
oportuerit  
pati & cœ-  
lum occu-  
pare.*

Neq; nos soli aut primi sumus qui dixerimus oportere Christum cœlos possidere aut accipere usque ad iudicium: quod nobis vitio vertunt, & detorquent quasi Christo vim afferte eumque cogere conentur. Denim Petrus ante nos his verbis usus est, Christum oportere cœlum accipere, &c. Similiter scriptum est, Christum oportuisse pati, & sic intrare in gloriam suam. Cæterum in his locis scripturæ, Oportet siue necesse est, non est seruilis quædam molesta & inuoluntaria coactio, sed diuini consilij, & optimi ordinis uoluntaria executio. Quemadmodum enim Christum oportuit pati, quia ita Dei consilio ordina-

tum  
111

tum erat, & humanum genus non aliter redimi poterat, ideoq; Christus necessarium hoc consilium suo ordine volens & libens passione & morte sua impleuit: ita etiam Christum oportet cœlum occupare & possidere, iuxta Dei decretum, voluntarie libenter & absque omni coactione: quia propter assumptam humanam naturā, quæ in clarificatione non abolita est, aliter fieri nequit, nisi humana natura abijciatur vt non amplius in Christo sit: quod tamen impossibile est, nisi vnicam Christi personam diuidere velimus, vt deinceps post clarificationem Christus Deus tantū, non simul etiam homo sit & maneat: quod tamen & ipsum impossibile est. Præterea nostræ utilitatis causa ita fieri oportuit, vt in Christo cer-  
namus quonam nobis perueniendum sit, & quis sit locus nostræ felicitatis futurus: quādoquidem dixit, vbi ego ero ibi & minister meus erit. Item, Assumam vos ad me. Ex his constat quomodo necesse seu oportet illud intelligendum sit.

Actantū abest vt nostra sententia contraria sit veteri orthodoxæ ecclesiæ, vt maiores nostri, sicuti supra dixi, nūquā ne cogitarint quidē cœlū esse in terris, & sub terra apud inferos, aut etiā vbiq;.

*De dextra Dei, an possit certus locus nominari?*

**A**liud deinde crimen nobis hoc Testamento imponitur, quod per dextrā Dei

*Dextera Dei in scripturis plurā significat*

## RESPONSIO AD

intelligamus definitum cœli locum, absque ullo testimonio scripturarum, erroneæ & damnatæ, &c. Ad hæc igitur criminationem respondemus nomen dexteræ Dei plura significare in sacris literis, primum enim virtutem & potentiam Dei significat, atq; equalitatem honoris, maiestatis & gloriæ, veluti Psalm. 18. 44. 110. Ephes. 1. Et iuxta hunc sensum Christus sedet ad dexteram Dei, id est eiusdem est potentiz & virtutis, honoris, gloriæ & maiestatis cum Deo patre. Actorum 2. Hebr. 2.

Quoniam vero Christus in exaltatione sua & sessione ad dexteram Dei patris, humanam naturam non deposuit, ut illa deificaretur, hoc est transmutaretur in diuinam naturam: quoniam etiam in maiestate sua subinde filius hominis nominatur: ideo alia significatione dextera Dei nominatur locus quietis & felicitatis in cœlis; atque in hoc sensu quibusdam in locis scripturarum dexteræ additur nomen cœli, & in alto vel in excelso, quæ omnino certi definitique loci sunt nomina. Ita nanque de D. Stephano scriptum est. Quum autem esset plenus Spiritu sancto intentis in cœlum oculis vidit gloriam Dei, & Iesum adstantem ad dexteram Dei. Et ait, Ecce conspicio cœlos apertos, & Filium hominis adstantem ad dexteram Dei. Diserte hic nominatur dextera Dei, & Filius hominis in gloria sua,

**Dextera  
Dei locus  
beatitudinis.**

**Act. 7.**

ria sua, qui non ubique stat sed ad dexteram Dei. Stephanus enim intentis sursum in cœlum oculis aspicit, & cœlum aperitur, ut Iesum in cœlis ad dexteram Dei cernat. Ex his necessario conficitur dexteram Dei nomen esse loci in cœlis: nam si ubiq; & non in cœlo tantum esset Stephanum undiquaq; circumspicere, non oculos tantum in cœlum intendere oportuisset: neq; etiam necesse fuisset cœlum aperiri ut Dominum ad dexteram cerneret, si dextera Dei non esset locus cœli. In eandem sententiam de Christo D. Petrus <sup>1. Pet. 3.</sup> scribit, Qui est ad dexteram Dei, profectus in cœlum, subiectis ipsi Angelis & potestatibus & virtutibus. Quibus verbis ostenditur Domino in exaltatione omnia subiecta esse, nihilominus tamen dexteram Dei in cœlis esse, in quos Dominus corporaliter ascendit. Paulus quoque Filium <sup>Heb. 1.</sup> Dei inquit consedisit ad dexteram maiestatis in excelsis: nominatim in Excelsis inquit. Et alibi, Si resurrexistis cum Christo, superna querite, <sup>Coloss. 3.</sup> ubi Christus est ad dexteram Dei sedens. Supernae curate non terrestria. Item, Christus ad dex- <sup>Heb. 12.</sup> teram throni Dei consedit. Porro quis sit Dei thronus Christus ipse in euangelio docet, his verbis, Ne iuretis omnino: neque per cœlum, quia <sup>Matth. 5.</sup> thronus Dei est.

Hec testimonia scripturæ non corrumimus, aut contra sententiam veteris ecclesiæ citamus, <sup>Quid veteres per dexteram Dei intellexerint.</sup>

## RESPONSIO AD

eum & illa per dexteram Dei intellexerit, primum quidem parem potentiam & maiestatem: deinde etiam propter veritatem humani corporis in Christo, certum & definitum locum: Huius sententiæ aperta testimonia habentur apud Cyprianum in Expositione symboli: apud Augustinum in libris De fide & symbolo, cap. 7. De agone Christi cap. 26. Epistola 122. ad Consecratum: item epist. 27. & 146. apud Theodoretum lib. 2. dialogorum. Alibi etiam plura testimonia nobis adducta sunt, verum nunc breuitati studemus, ac speramus ex his à quibusuis facile innocentiam nostram posse cognosci, nempe dogma nostrum, Dei dexteram esse definitum locum, non esse à nobis absq; vllis testimonijs scripturarum confictum erroneum & damnandum, ideoque crimen quod Testamentum illud nobis intendit non modo nullo fundamento niti, sed vna nobiscum quoque veterem orthodoxam ecclesiam damnari.

### *De omnipotentia Dei.*

**A**lia & vehementior accusatio est huius Testamenti, qua nos reos peragit quod sentiamus, neq; Dei omnipotentia neq; vlla alia vi & potentia effici posse, vt corpus Christi simul duobus aut pluribus aut etiam omnibus in locis præsens sit. Accusamur autem quod certo nominamus, & contra omnem æquitatem publice in-  
simula-

simulamur, quod omnipotentiam Dei abnegamus, & Deum sua potentia spoliemus, ac ex Christo faciamus hominem impotentem: cum tamen firmiter retineamus articulum fidei, Credo in Deum patrem omnipotentem: & Deo suum honorem integrum tribuamus, confidentes ipsum esse omnipotentem, qui cuncta efficere possit quæ voluerit, nulla re excepta.

Confitemur Deum esse omnipotentem.

Porro Dei omnipotentia olim hæretici turpiter abusi sunt, veluti Praxeas qui argumentabatur, Deo omnia sunt possible, igitur Pater crucifixus est, &c. Cui Tertullianus respondet, non esse quidvis ex omnipotentia Dei concludendum, ac si Deus omnia faceret quæ posset. Sed ex voluntate Dei concludendum esse, hoc Deus vult, ergo etiam potest. Quod enim non vult, etiam non potest: non tamen quod non possit si velit: Itaque Dei velle etiam posse est, & non velle est non posse. Similiter etiam Theodoretus Dialogo tertio scribit, Deo id esse impossibile, quod ipsius verbo naturæ ac voluntati repugnat.

Potentia sequitur ex voluntate Dei.

Quamobrem non nostram sententiam de Dei omnipotentia proferimus, sed idē dicimus quod Patres olim docuerunt: neq; etiam nobis de omnipotentia Dei cum quoquam controversia est, quam ingenuè profiteamur, tantū de hoc quæstio est, An Deus omnipotentia sua efficiat ea quæ naturæ illius & verbo ac voluntati contraria sunt.

## RESPONSIO AD

Scripturæ igitur sic nos de hac re docent, ut nominatim commemorent nonnulla quæ Deo sint impossibilia, veluti, peccare, mori, mutari, mendacem & inconstantem esse, seipsum negare seu mendacij arguere, & alia huius generis. Verum hac ratione omnipotentia Dei non infirmatur, aut negatur, vel contumelia afficitur: Deus enim nihilominus est omnipotens, etiamsi ea quæ voluntati eius repugnant & iniusta sunt non faciat. Quæcunque enim Dei naturæ & voluntati in verbo ipsius patefactæ repugnant, hæc non faciunt ad potentiam eius & gloriam, sed contra essent indicia impotentiae & ignominiae, ut ex his apparet quæ commemorauimus: itaque fideles hæc nullo modo Deo tribuunt: neque Dei potentia & gloria his eget, in quibus reuera nulla est potentia & gloria. In hanc autem sententiam etiam de Dei omnipotentia docuerunt Augustinus de Ciuitate Dei lib. 5. cap. 10. Et Theophilactus in Marcum cap. 10. Quare denuo scripturis & testimonijs veteris ecclesiae euicimus, nostram doctrinam de Dei omnipotentia, non esse (vti accusatur) à nobis absq; testimonio scripturarum confictam, nouam & hactenus inauditam, erroneam atq; damnatam.

*Corpus Christi non esse vbiq. sed in vno  
Cæli loco.*

Dein.



**D**Einceps nobis expendendum est an corpus Domini nostri Iesu Christi quod ex beata virgine assumpsit, in gloria & exaltatione sua ad dexteram Dei, per Dei omnipotentiam ita deificatum sit, vt non amplius iuxta naturam humanorum corporum in vno loco sit, sed simul in multis locis & vbiq;, seu vndiq; in cœlo & in terris existat: An inquam hæc sit voluntas Dei verbo ipsius patefacta, vt verum corpus Christi non circumscribatur aliquo cœli loco, sed vbique sit. Etenim nisi ostendatur hanc esse Dei voluntatem verbo eius expressam, quod Christi corpus omni circumscriptione careat, & vbiq; etarium factum sit, frustra Dei omnipotentia prætenditur, vt quæ hic nihil probare possit.

Ante resurrectionem igitur & exaltationem Christi, non est dubium corpus ipsius non fuisse vbiq;, sicut & ipsemet aperte hoc testatur Ioannis 11. quare à tempore resurrectionis nostram demonstrationem inchoabimus. Cum igitur Dominus è sepulchro & à mortuis surrexisset, illo ipso corpore quo crucifixus fuerat, mulieribus fidelibus ipsum quærentibus, ab Angelo dicitur, Iesum illum Nazarenum quæritis, qui fuit crucifixus: surrexit, non est hic: ecce locus vbi posuerant eum. Ex hoc Angeli testimonio discimus corpus Christi post resurrectionem non fuisse vbiq;: alias enim eo sepulchri loco fuisset, in quo ipsum

Corpus Christi ante resurrectionem non fuit ubiq;.

Post resurrectionem quoq; non esse ubiq;.

Marc. 16.

## RESPONSIO AD

*Demonstratio ueri & circumscripti corporis.*

*Thomas Christum tangit. Ioan. 20.*

mulieres querebant: sed angelus aliter asserit, Ne surrexit inquit, & non est hic. Rursus die paschatis quum ad discipulos venisset, Lucæ 24. & illi putarent se spiritum conspicerere, ostendens illis manus & pedes ait, Quare huiusmodi disceptationes subeunt corda vestra, ego ipse sum, conrectate me & videte: nam spiritus carnem & ossa non habet, prout me conspicitis habere. Est autem obseruandum quod Dominus ipse corpus suum non spiritum sed carnem & ossa nominat, & ait illud visibile & contrectabile esse.

Cum vero Thomas huic demonstrationi non interfuisset, & cæteri discipuli commemorarent se Dominum corpore suo quo à mortuis resurrexisset uidisse, respondit ille, Nisi videro in manibus eius vestigium clauorum, & immiserò manum meam lateri eius nequaquam credam. Octo igitur post diebus benignus & clemens Dominus rursus ad discipulos veniens, & Thomam nominatim vocans, ait illi, Infer digitum tuum huc, & vide manus meas, & profer manum tuam & immitte lateri meo, & ne esto incredulus sed credens. Atque addit, Beati qui non viderunt & crediderunt. Quid crediderunt? Dominum vere proprio veroque corpore, non mutato in spiritum aut annihilato, à mortuis resurrexisse. Quare necessario conficitur hanc esse veram fidem, si credamus, Dominum post resurrectionem.

rectionem suam verum corpus seruare, in sua natura, proprietate, & membrorum dimensione, &c. vnde etiam sequitur corpus Christi finitum esse & circumscriptum, non in plura loca aut vbi-que diffusum.

Pari modo ascensione Christi in cœlos corpus eius non est mutatum in spiritum aut vbiq̃uetarium factum, sed proprietatem & membra atq; dimensionem veri corporis seruat, sicuti superius ex verbo Dei de ascensione clare ostendimus. Verum quod quidam opinantur & asserunt, exaltatione & sessione in throno maiestatis Dei vbiq̃uetarium factum esse, falsa opinio est, & error dudum damnatus. Adhuc Dominus ipse in Euangelio inquit, Dico vobis ab hoc tempore videbitis Filiū hominis sedentem ad dexteram potentix Dei, & venientē in nubibus cœli. Matt. 24. & 26. Item in Apocalypsi primo capite scribitur, Ecce venit cum nubibus, & videbit eum omnis oculus, etiam qui eum transfixerunt. Similia Ioannes Euangelij sui 19. capite à Zacharia propheta affert. Porro nomine Filij hominis omnes orthodoxi non alium intelligunt quam dominū nostrū qui veram naturā humanā etiam in gloria seruat, & eandē in extremo iudicio vniuersis hominibus ostēdet. Verba ipsa perspicua & vehemētia sunt, Filium scilicet hominis sedere ad dexterā potentix Dei. Filiū hominis venturū in nubibus cœli.

Corpus  
Christi a-  
scensione  
& sessione  
ad dexterā  
non est fa-  
ctum vbi-  
q̃uetarium

## RESPONSIO AD

omnem oculum visurū esse ipsum: hunc inquam qui confossus & transfixus fuit, quod est verum & circumscriptum Christi corpus.

3 Paulus etiam ad Philippenſes ea ſcribit quæ ſatis ſunt ad hanc controuerſiam tollendam & explicandam, patria aut ciuitas noſtra eſt in cœlis, vnde etiam ſeruatoreſ expectamus Dominum Ieſum Chriſtum. Qui transformabit corpus noſtrum humile, vt conforme fiat corpori ſuo glorioſo, pro efficacitate qua poteſt etiam ſubijcere ſibi omnia. In hoc præclaro Apoſtoli teſtimonio primum indicatur locus patriæ ſeu habitationis noſtræ in beatitudine, non vbi que ſed ſuperne in cœlis, in eo autem cœlo in quo etiam Chriſtus Seruator noſter eſt, & vnde eum expectamus venturum ad iudiciũ. Secundo tempus liberationis & glorificationis noſtræ definitur, nempe aduentus Domini ad iudiciũ. Tertio breuiter deſcribitur totum negotium gloriæ & clarificationis noſtrorum corporum, & huius modus ac ratio. Vtut autem hic verbo transformandi *μεταμορφωθήσεται* inquit, corpus noſtrum humile miſerum & ægritudinibus obnoxium: conforme etiam inquit *ὡς μορφῇ* corpori ſuo glorioſo *τῆς δόξης αὐτοῦ*, gloriæ & claritati ſuæ. Ex his autem verbis hæc diſcenda nobis ſunt. Primum corpora noſtra miſera transformanda eſſe: ita vt conformia ſiant glorioſo

Locus patriæ noſtræ

Tempus noſtræ glorificationis

Modus & ratio glorificationis noſtrorum corporum.

glorioso corpori Christi. Secundo in Christi corpore clare cernimus qualis sit futura nostra glorificatio, nempe similis glorificationi Christi, sed tamen (vt veteres quoq; dixere) definito modo, quantum ad nos. 1. Cor. 15. Alioquin gloria Christi vt filij Dei, ineffabilis est, ac gloriosa supra omne nomen. Tertiò glorificatio nostra hac ratione perficitur, vt quicquid in corpore nostro debile est gloriosum fiat. Paulus hoc negotium 1. Cor. 15. eleganti antithesi illustrat, opponit enim corruptioni obnoxio corpori, incorruptum corpus, ignominia, gloriam, infirmitati potentiam, corpori animali spirituale corpus, & terreno celeste. Et si autem summa diligentia discrimina humilis & gloriosi corporis ab Apostolo commemorantur, nusquam tamé definito & circumscripto corpori vbiquetarium opponit, ac glorioso corpori tribuit quod vbiq; sit. Etenim in glorificatione nostra quæ extremi iudicij die futura est, corpora nostra suam substantiam, carnem & ossa & horum proprietatem atque formam non perdent, ea duntaxat à vero corpore auferantur quæ ex peccato sunt, nempe quod mortui, infirmitati, ægrotudini, corruptioni, & turpitudini obnoxium est. Substantia hominis & proprietas & membrorum dimensio atque conformatio fuerunt in homine antequam in peccatum laboraret, per peccatum verò morti & varijs in-

## RESPONSIO AD

firmitatibus obnoxia reddita sunt quare auferentur à corpore huiusmodi infirmitates, ipsa tamen substantia corporis manebit, erit autem illa stris, clara, pulchra, potens, libera ab omni infirmitate & turpitudine, non tamen spiritus absque carne & ossibus, non corpus incomprehensibile & inuisibile, quod lapides & ferrum penetret, atque in pluribus simul locis existat, incircumscriptione aut ubique sit. Omnia verò hæc confirmantur etiam articulo fidei nostræ, quo profitemur nos credere resurrectionem corporis huius, siue carnis.

Quamobrem ex his quæ exposita sunt concludimus, quandoquidem nostra corpora siue caro nostra à mortuis vere resurget, ita ut integrum nostrum corpus cum omnibus suis membris certo definitoque loco non ubique futurum sit: nostra vero hæc corpora conformia erunt glorioso corpori Christi, ut ex Paulo apparuit, necessario etiam corpus Christi in gloria non ubique, sed finitum atque circumscriptum esse. Recte autem à corpore nostro argumetamur de corpore Christi, & è conuerso à corpore Christi de nostro: eadem enim rationatione Paulus quoque usus est 1. Cor. 15.

Doctrina  
veteris Ec  
clesiæ de  
hæc,

Porro quæ hætenus protulimus de natura & proprietate glorificatorum corporum, & de resurrectione à mortuis, ea non nos confirmant

sed

Ex testimonijs scripturæ & doctrina veteris ecclesiæ depromimus, id autem si qui certius cognoscere desiderant legant Tertullianum De carne Christi, &c. De resurrectione carnis: Cyprianum in Expositione symboli, articulo, Credo resurrectionem carnis. Hieronymum ad Pammachium contra Ioannem Hierosolymitanum, qui sectabatur Origenis errorem, nempe corpora glorificata fieri (sicuti etiam nostra ætate quidam docere incipiunt) subtilia, inuisibilia & incomprehensibilia. Legantur etiam ea quæ scribit D. Augustinus libro de Ciuitate Dei 13. cap. 17. 22. & lib. 22. cap. 21. & De fide & symbolo. Item quæ Cyrillus habet in Ioannem libro 11. cap. 57. 58. 59. &c.

Præterea nostram doctrinam quæ asserimus corpus Christi in gloria non vbique sed in cælo esse, loco beatitudini perpetuæ diuinitus destinato, confirmat etiam Theodoretus Dialogo 2. contra hæreticos: & beatus martyr Vigilus Tridentinus episcopus lib. 4. contra Eutychianos, inter alia ita scribens. Diuersum est autem & longe dissimile circumscribi loco, & vbique esse: & quia verbum vbique est, caro autem eius vbique non est. Ac paulo post addit, Hæc est fides & confessio catholica, quam Apostoli tradiderunt, martyres roborauerunt, & fideles nunc vsq; custodiunt. Esti autem duo hæc testimonia ordine producta

## RESPONSIO AD

nostræ doctrinæ confirmandæ sufficiunt, addemus tamen etiam tertiū ex epistola 57. D. Augustini ad Dardanum: vt iuxta verbum Domini in ore duorum aut trium testium omnis controuersia consistat. Sunt autē hæc D. Augustini verba,

Noli itaque dubitare ibi nunc esse hominem Christum Iesum, vnde venturus est, memoriterque recale & fideliter tene Christianam confessionem: quoniam resurrexit à mortuis, ascendit in cœlum, sedet ad dextram patris, nec aliunde quàm inde venturus est ad viuos mortuosque iudicandos. Et sic vêturus est illa angelica voce testante, quemadmodum ire visus est in cœlum, id est in eadem carnis forma atque substantia, cui profecto immortalitatē dedit, naturam nō abstulit. Secundum hanc formam non est putandus vbique diffusus. Cauendum est enim ne ita diuinitatem adstruamus hominis, vt veritatem corporis auferamus. Non est autem consequens, vt quod in Deo est, ita sit vbique vt Deus. Nam & de nobis verissima scriptura dicit, quod in illo viuimus mouemur & sumus, nec tamen sicut ille vbique sumus: sed aliter homo ille in Deo, quoniam aliter & Deus ille in homine proprio quodam & singulari modo. Vna enim persona Deus & homo est, & vtrumque est vnus Christus Iesus, vbique per id quod Deus est, in cœlo autem per id quod homo. Atque hætenus Augustinus.

Testi.



Testimonium hoc ideo verbotim adscripsi  
 ut cunctis manifestum sit D. Augustinum non  
 suam ipsius tantum sententiam commemorare,  
 sed totius catholicæ ecclesiæ, qualis tum tempo-  
 ris & ab initio vsque in illa recepta & approbata  
 fuit. Quare etiam cuius hinc perspecta esse po-  
 test nostra innocentia, & quam iniquissime Bren-  
 tij testamento accusemur, quod hanc doctrinam  
 confinxerimus absque testimonijs scripturarum  
 & contra sententiam veteris & orthodoxæ eccle-  
 siæ: ideoque illam erroneam & damnatam esse.  
 Nam cum veris testimonijs ostenderimus non  
 esse hanc Dei voluntatem, ut assumptum corpus  
 à filio Dei exaltato ad dextram Patris, pluribus  
 locis aut vbique sit, simul etiam apparet omni-  
 potentiam Dei contra eius rectum vsum nobis  
 obijci: ideoque nihil hinc confici posse. Verum  
 autem perpetuoque firmum est Christum domi-  
 num iuxta diuinam naturam vbique esse, sed iux-  
 ta humanam naturam non esse vbique, sed su-  
 perne in cælis loco beatitudinis præparato à  
 Deo electis suis, quo & nos ad ipsum peruentu-  
 ros speramus.

*De personali vnione diuinæ & humanæ  
 nature in domino nostro Iesu Christo.*

**A**ccedimus nunc ad aliud caput Testamen-  
 ti Brentiani, quo dicitur nostram doctri-  
 nam de vero corpore Christi, cõtumeliosam seu

## RESPONSIO AD

blasphemam item & repugnare sanæ doctrinæ de personali vnione duarum naturarum in Christo, diuinæ & humanæ, ac maiestati & gloriæ quæ exaltatus est supra omne nomen, vt coram ipso flectatur omne genu, in cælo & in terra & sub terris. Euerti item à nobis & corrumpi maiestatem humanæ naturæ, quæ propter personalem vnionem Dei & hominis donata atq; ornata est.

**Confessio  
nostra de  
personali  
vniõne utri  
usq; naturæ  
in Christo.**

**Symboli  
Athanasij.**

Verum nos vt antehac semper ita nunc quoque vere & simpliciter profiteamur, nos nunquam aliter docuisse aut docere de personali vnione duarum naturarum in Christo, quàm sacræ literæ docent, & vetus ecclesia, cuius sententiæ in symbolo Athanasij his verbis expressa est. Sed necessarium est ad æternam salutem, vt incarnationis quoque domini nostri Iesu Christi fideliter credat. Est ergo fides recta, vt credamus & confiteamur, quod dominus noster Iesus Christus Dei filius, & Deus & homo est: Deus est ex substantia Patris ante secula genitus, & homo est ex substantia matris in seculo natus. Perfectus Deus, perfectus homo, ex anima rationali & humana carne subsistens. Aequalis patri secundum diuinitatem, minor Patre secundum humanitatem. Qui licet Deus sit & homo, non duo tamen sed vnus est Christus: vnus autem non conuersione diuinitatis in carnem, sed assumptione humanitatis in Deum: vnus omnino non confusione substantiæ

stantis, sed vnitatem personarum. Nam sicut anima rationalis & caro, vnus est homo: ita Deus & homo vnus est Christus. Atque hæc est catholica confessio Christianæ fidei symbolo Athanasij comprehensa. Nos quoque sic docemus, & sic etiam ore cordeque credimus, neque præter hanc vllam aliam doctrinam de personali vnione habemus, quam tamen Testamentum hoc temere & absque vlla nostra culpa damnat, & veritati contrariam atque blasphemam esse calumniatur.

Atque Cæterum verba D. Ioannis, Verbum caro factum est, hoc est Deus homo factus est, aliter accipienda sunt quam id quod in eodem Evangelio scribitur aquam in nuptijs in Cana Galilee vinum factam esse: non enim simul aqua fuit & vinum, sed vinum duntaxat non autem amplius aqua fuit. Quare interpretatio verborum Ioannis à D. Paulo petenda est, qui scribit, Deum formam serui accepisse, & hominibus similem factum esse. Item, non Angelos assumpsisse sed seminem Abraham. Manifestum autem est id quod asseritur, ab assumente relinqui in sua natura non aboleri & annihilari. Ideoque de Christo credimus ipsum æternum, immortalem, omnipotentem, & vbique præsentem esse: & eundem rursus temporis initium habere, mortique & infirmitati obnoxium fuisse, vno etiam in loco & non vbique esse. Nam iuxta diuinam naturam æternus &

Verbum caro factum est. Ioan. 1.

Philip. 2.

Heb. 3.

# RESPONSIO AD T

& omnipotens est, iuxta humanam mortalis finitus & circumscriptibilis neq; ubiq; præsens est

*Distinctione duarum naturarum in Christo*

*non solui aut diuidi unicam ipsius personam.*

Nestorius  
diuidebat  
personam  
Christi.

**C**um asserimus Christum secundum diuinitatem ubique esse, & eundem non esse ubique secundum humanitatem, accusamur quod eum Nestorio personam Christi diuidamus, ex vno duos Christos faciamus: vnum qui ubique præsens sit, & alterum qui tantum in cælo & non ubique præsens sit: hac autem ratione unicam Christi personam solui & diuidi.

Ubiq; esse  
diuinæ na-  
turæ pro-  
prium est.

Verum nobis videtur personam Christi magis solui & diuidi, si dicamus corpus eius vniuersionis gratia ubique esse: nam nullo loco circumscribi sed ubique præsentem esse, diuinitati tantum maiestati proprium est, neque vllum verum corpus humanum, aut vlla res alia præter Deum ubique esse potest. Quare si etiam corpus Christi ubique foret, non amplius esset verum humanum corpus; atq; ita vnica persona Christi, qui verus Deus & homo est, solueretur; si enim secundum humanam quoque naturam ubiq; foret, iam Deus duntaxat esset, & non amplius verus homo.

Personæ di-  
stinctione  
naturarum  
non diuidi  
poss.

Num vero credendum est angelos quoque diuississe personam Christi, dicentes. Christi corpus resurrexisse & non esse in sepulchro: item ipsum non hic esse sed in cælos ascendisse? Imo

Domi.

Dominus ipse qui dixit. Pauperes semper vobiscum habebitis, me autem non semper habebitis? An verò dicemus personam Christi diuisam esse & tres Christos fuisse, quando corpus eius iacuit in sepulchro, anima descendit ad inferos, diuinitas verò vbique fuit? Manifestum est nanque animam Christi triduo à corpore fuisse separatam, & animam atque corpus non vbi que fuisse vt diuinitas fuit: neque tamen propterea diuinitas animam aut corpus deseruit, neque hæc à diuinitate separata fuerunt, sed vnus Christus Deus & homo indiuisus mansit. Eadem autem ratio est quando dicimus corpus Christi non esse vbique, quoniam vtraque natura in hac vnione suas proprietates seruat.

Eutychiani olim orthodoxos qui naturas in Christo distinguebant, & dicebant Christum secundum diuinitatem esse vbique, secundum humanitatem verò non esse vbique, criminabantur, & Nestorianos vocabant qui personam Christi diuiderent: ipsi nanque docebant, post vnionem, aut post resurrectionem & ascensionem Christi, corpus eius in gloria diuinitati conforme factum esse, ideoque sicut & diuinitas vbique esse. Horum igitur criminationem refutat beatus martyr Vigilus lib. 1. contra hæreses, & sacræ triadis meminit in qua sunt tres distinctæ personæ, & tamen non tres dii sed vnus tantum Deus: inter

Doctrina  
veterum  
hac ca.

## RESPONSIO AD

cætera autem sic scribit, Si igitur hæ tres personæ habentes singulæ proprietates suas, quibus significantius distinguantur non quibus separentur, vnus est Deus, quomodo filius salua vtriusque naturæ proprietate, non vnus est Christus? Adducit deinde simile animæ & corporis, quæ ambo suas proprietates seruant, & tamen vnus tantum est homo non duo. Similia etiam docet Theodoretus libro 3. dialogo: aduersus hæreses: quæ nunc commemorare longum esset. In summa tamen, hinc diuinis & humanis testimonijs constat, nos propterea non diuidere personam Christi, & ex vno duos Christos facere, propterea quod retinemus distinctionem naturarum in Christo: qua de re alibi plura & exactiora protulimus.

### *De maiestate et gloria Christi.*

*Maiestas  
Dei Deus  
ipse.*

**P**ORRÒ quod maiestatem & gloriam Domini nostri Iesu Christi attinet, docemus eodem modo quo multi quoque ante nos pie recteq; docuerunt, maiestatis & gloriæ nomen aliquando pro ipsa Deitate gloriosa accipi: quemadmodum vulgo dicitur, diuina Maiestas. Hæc maiestas in ipsa statim incarnatione humanæ naturæ vinculo indissolubili vnita est, neq; hæc maiestas noua quædam & creata diuinitas est, sed vnica essentialis & æterna diuinitas, quæ humanam naturam suscepit & se illi coniunxit, non exæquatione aut  
com.

commixtione, sed vnione duarum naturarum  
in vnā personam: vt supra satis ostendimus.

Verum alterius quoque gloriæ in scripturis  
mentio fit quam Dominus non semper habuit,  
velut tempore exinanitionis suæ: huius men-  
tio fit in Euangelio vbi Christus orat Patrem  
vt se clarificet, & eiusdem meminit D. Augusti-  
nus in Ioannem Tractatu 104. Initium autem  
accepit hæc gloria & maiestas Christi à resurre-  
ctione ipsius: nam ante resurrectionem in sta-  
tu exinanitionis, Dominus, qui tamen semper  
verus Deus erat, seipsum humiliavit ad mortem  
vsque, contumelias & iniurias pertulit, & igno-  
miniosam mortem in cruce: neque in humilia-  
tione ista habitus fuit is qui & qualis erat. Post-  
quam verò in hac humiliatione & exinanitio-  
ne sua mundum redemit, gloriam suam (quam  
hactenus aliquo modo tantum vt Ioannis 2. cap.  
Matthei 17. cap. miraculis & illustri patefactio-  
ne exertuerat) singulari & eximia ratione decla-  
rauit, resurrectione sua, ascensione in coelos, &  
sessione ad dexteram Dei, partim etiam magnifi-  
ca glorificatione sui corporis: item quod pater va-  
rijs rationibus declarauit hunc, non tantum ho-  
minem, sed etiam verum Deum esse, qualem ta-  
men hactenus mundus propter exinanitionem  
& humilitatē sui non agnouerat. Deus enim filio  
hominis omnem diuinā gloriā & maiestatem

*Maiestas  
quam deus  
minus non  
semper ha-  
buit.*

## RESPONSIO AD

meo vniuersa dedit quorum humana natura abque sui abolitione & corruptione capax est. De hac singulari & eximia gloria Paulus differit, hac etiam nos ex animo agnoscimus & confitemur, & Dominum Iesum verum Deum & hominem ad dexteram Dei adoramus. Verba autem Apostoli quibus hanc gloriam prædicat ista sunt. Ipse se summisit, factus obediens vsque ad mortem, mortem autem crucis. Quapropter etiam Deus ipsum in summam extulit sublimitatem, ac donauit ei nomen quod est supra omne nomen; vt ad nomen Iesu omne genu se flectat celestium ac terrestrium & subterraneorum: omnisque lingua confiteatur Dominum esse Iesum Christum ad gloriam Dei patris. Non igitur nos negamus (vti immerito & iniuste insinulamur atque accusamur) Christo omnem potestatem in cælo & in terra datam esse, & ipsum iuxta vtranque naturam mundum gubernare, & nos redimere atque iustificare, item carnem eius esse viuificatricem, & cum verbo cui humana natura in vnâ personam inseparabiliter vnita est, vnâ eademque adoratione esse adorandam. Hæc enim omnia libere & ex animo confitemur, quem admodum etiam orthodoxi Patres Christianæ ecclesiæ, à qua nullo pacto nos separamus, cuncta hæc ante nos confessi sunt, & scriptis suis confirmarunt, quos in hac causa sequimur, neque

quic.



quicquam ipsi innouamus aut ab alijs innouatum approbamus.

*Conclusio huius controuersie de personali vnione diuina & humana natura in vna indiuisaque Christi persona.*

**I**n summa verò de vnione duarum naturarum in vna & indiuisa persona & de maiestate atque gloria Domini nostri Iesu Christi, prorsus insentimus quemadmodum ex verbo Dei definiit & sensit vetus ecclesia, cuius 636. clari & precipui ministri tempore Martiani imperatoris Chalcedone contra Eutychem conuenere, & ita statuerunt.

Sanctos itaque Patres sequentes, vnum & eundem confitemur filium Dominum nostrum Iesum Christum, & concorditer docemus omnes: perfectum in diuinitate, & eundem perfectum in humanitate: verum Deum & verum hominem, eundem ex rationali anima & corpore: coessentiali Patri secundum diuinitatem, & coessentiali nobis secundum humanitatem, per omnia nobis similem, dempto peccato: ante secula genitum ex Patre secundum diuinitatem, postremis verò diebus propter nos & propter nostram salutem, ex Maria virgine & deipara, secundum humanitatem: vnum & eundem Iesum Christum filium Dei Dominum & vnigenitum in duabus naturis, inconfuse, inconvertibiliter, indiuisum &

Decretum  
Chalcedo-  
nenis con-  
cilij.

## RESPONSIO AD

Nota.

inseparabiliter manifestatum : haudquaquam differentia naturarum propter unitatem substantia, sed magis utriusque naturæ ( in unam personam & unam hypostasim concurrentis ) proprietate servata : non ut in duas personas bipartiatum aut diuidatur, sed ut sit unus & idem filius unigenitus, Deus verbum & Dominus noster Iesus Christus : sicut de illo olim Prophetæ vaticinati sunt, & ipse nos Christus instruxit, ac Patrum nostrorum symbolum tradidit. Hisce itaque à nobis cum omni diligentia & cura expressis, determinavit sancta œcumenica synodus, nemini licere aliam fidem adferre, aut conscribere, aut componere, vel sentire, vel docere alios.

Cuncta autem quæ hoc decreto continentur ex animo profiteamur, neque id in falso & peregrino sensu, sed ut verba sonant, ut illa interpretatus est beatus Vigilius, & Theodoretus qui & ipse concilio magna cum laude interfuit.

Acqua desentio.

Quoniam verò hæc reipsa sic se habent, honestius abstinuisset Testamentum hoc, acerbissima illa criminatione, qua doctrinam nostram calumniatur contrariam esse, sanæ doctrinæ de unione personali & gloria ac maiestate Domini nostri Iesu Christi, quam à nobis inquit everti & corrumpi. Etenim Dei beneficio rem aliter se habere manifestum est : quare etiam intoleranda

letanda hæc conuicia & calumnias æquo iudici committimus. Interea cunctos rogamus vt diligenter expendant, cum scripturæ sanctæ & orthodoxorum patrum testimonijs manifestè demonstratum sit, corpus Domini nostri Iesu Christi etiam in gloria non esse vbique, an non sit temeraria & confidens arrogantia, atque pertinax litigandi studium, nihilominus prædicare vbiquitatem corporis Christi, & eam colore diuinæ maiestatis fucare, quasi vera maiestas Christi nunquam hætenus vere in ecclesia agnita fuerit, aut illi attributa, nisi nostra demum ætate qua Vbiquetarij ingens hoc mysterium in lucem protulerunt. Sed hæc prudentum iudicio relinquimus.

*An doctrina nostra in ecclesia nullū locum habere debeat.*

**A**Nxie præterea sollicitum est Testamentum illud Brentianum, ne cōmemorata Zuinglianorū doctrina forte in ecclesia superet, id enim si fiat iræ diuinæ & hominū ingratitude ni adscribit. Verū cui quæso hoc ascribet, quod illa ipsa doctrina, quæ testamento hoc adeo vehementer proscinditur, in veteri & orthodoxa ecclesia ab Apostolorum vsque ætate recepta fuit, cui vbiquitas & deificatio corporis Christi in gloria, quā Testamentū hoc nobis titulo diuinæ maiestatis obtrudere conatur, prorsus incognita fuit

*Doctrinam nostram ab ab initio in orthodoxa veteri ecclesia locum habuisse.*

## RESPONSIO AD

nisi quatenus Eutychiani Timotheani & Acaphali & nonnulli alij hæreticorum hæc in disputationem vocarunt. Nostra quoque ætate non ira multæ sunt ecclesiæ & gentes quæ hanc ubi-quitatem defendant, quantumvis multa de illa Testamentum hoc intonet, Dei enim beneficio maior pars veterem & orthodoxam sententiam retinet, quam nos quoque seruamus, quæ naturas in Christo diuinam & humanam non confundit, aut abolet & nuda tantum nomina relinquit.

*De Arianis, & homicidij atque mendacij spiritu.*

Non esse  
nos Arianos.

**C**onferimur Ario veteri hæretico, sed iniuria apud simplices quasi Ariani simus in suspicionem & odium vocamur: non enim Ariani sumus, neque quicquam nobis cum eius blasphema doctrina commune est, neque vnquam in æternum Deo volente erit. Cæterum scripta à nobis in publicum edita, reliqui labores nostri, quotidianæ conciones, & nostrarum atque exterarum ecclesiarum testimonia, aperte probant nos (quod absque arrogancia dictum sit) plus alijs aduersus Arianos & alios hæreticos certasse. Quid igitur ad nos quod Ariani quidam imperatores & Reges orthodoxos grauissima tyrannide oppresserunt? Quo denique iure nobis imputatur aliorum culpa, cū quibus nihil nobis commune

munne est? Notū est ex historijs Eutychianos frequentem Synodum Ephesi conuocasse quæ *λυσί* nominata est, in qua probarunt illam doctrinā quam postea orthodoxa ecclesia verbi Dei testimonio confutauit, scilicet Dominum nostrum Iesum Christum in adunatione & post ascensionem in cœlos, in gloria deificatum non amplius retinere humanæ naturæ proprietates: cum autē in illa D. Flauianus Constantinopolitanus Episcopus solidis ac firmis testimonijs (quarum non nulla hodie quoq; extāt in epist. Flauiani ad Leonem, & altera Leonis ad Flauianum) eos oppugnaret, à Dioscoro episcopo Cōcilio eiectus fuit; pugnis contusus & calcibus impetitus, vt breui post moreretur. Si igitur parem crudelitatem ad uersarijs nostris ascribamus, qui tamen longe similiores sunt Eutychianis quam nos Arrianis, à quibus prorsus alieni sumus, num id æquo animo ferent? Quod si simplices Christianos prætextu & titulo Zuingliani erroris (vt Testamento hoc continetur) nō licet ferro persequi, sed ipsos duntaxat Zuinglianos, hoc est nos persequi & opprimere oportet: facile apparet quibus crimen hoc conueniat quod nobis impingitur.

Nunquam vero ullos fideles odio prosequuti sumus, aut illis vim & iniuriam aliquam intulimus, multo minus ferro eos persequi & delere cohati sumus: testis huius rei idoneus est Brentius

*Aduersarios nō  
stros nunquam per-  
secuti sumus.*

## RESPONSIO AD

ipse, qui cum acerbissime aduersus Dominū Oecolampadium in suo Antisyngrammate scripserit, & multa alia contra nostram doctrinam inhumaniter fecerit, nunquam tamen propterea læsus est, sed cum bello Germanico domo cedere coactus fuisset, neque posset amplius propter Hispanos in ecclesia sua subsistere, Basileam venit, & ibi humaniter atq; honorifice exceptus & à nomine iniuria affectus aliquandiu vixit. Ad nos quoq; nonnulli venere quos non ignorabamus antea immodeste admodum nos hereticos, Suermeros, Sacramentarios, & nescio quid non nuncupasse, cum autem possemus illis par pari rependere nequaquā id fecimus, neq; vel minima in re illos læsimus, sed eos humaniter & amice tractantes, amica quedam colloquia cū illis instituimus, quibus etiam effectum fuit vt seiplos melius noscerent. Porro quod nonnulli vt Seruetus, Gentilis, & quidam Anabaptistæ post multas admonitiones & longam experientiam capite multati sunt, iure diuino & Cæsareo comprobatur, cum sententia talis in illos lata sit propter horrendas & inauditas blasphemias, flagitia & facinora, per iuria atq; seditiones: quare non arbitramur nos propterea vllius crudelitatis accusari posse, aut quenquam esse qui tantas blasphemias & flagitia tueatur & impunita esse velit.

Præterea apud nos Tiguri colloquia aliquot  
habita

habita sunt, & Bernæ celebris disputatio, in quibus nostra doctrina, quæ Testamento hoc tam contumeliose proscinditur, comprobata est, neq; vlla contumelia affecti sunt illi qui in his disputationibus acerrime doctrinam nostram oppugnarunt. Hodie quoq; nulla vis affertur cuiquam ad nos venienti, etiamsi à nostra doctrina dissentiat. Libri etiam aduersariorum nostrorum publice & palam apud nos venduntur atq; leguntur, imo hortamur nostros vt eos legant, nam quia veritati certæ confidimus, non timemus aduersariorum scripta. Verum quid nobiscum & cum nostris libris agatur: vt nullum defendendi nostri locum habeamus, & lectione librorum nostrorum omnibus interdicator, nihilominus tamen inaudita causa damnemur, quomodo item principes & ciuitates contra nos iniuste & immerito concitentur, manifestius est, quam vt longa oratione opus sit, quare id ipsum committimus Deo & tempori, &c.

Quare multo satius fuisset Testamentum hoc maiore vti moderatione, & abstinere mentione Arrianorum, & tam grauib; conuicijs & contumelijs, nos scilicet quoniā spiritus mendacij, homicidij quoq; spiritus sit, aliquando latronum more fideles persecuturos & oppressuros esse. Dei enim beneficio, neq; latrones, neq; mendaces, neque spiritu diabolico obsessi sumus: neminē per-

## RESPONSIO AD

sequimur, neminem opprimere cupimus, quam bene autem Christiana æquitas & modestia erga nos seruetur, qui immerito adeo petulanter proscindimur, nemini huiusmodi conuictorum occasionem dantes, idipsum omnibus fidelibus, ac moderatis, & honestatis ac pacis studiosis hominibus expendendum relinquimus.

Quod autem Testamento hoc additur nō probari sibi tyrannidem & persecutionem eorū qui Zuinglij doctrina seductos gladio insectantur, ac se resipiscentibus, Cœlū non præcludere: non satis idonea medela est amaræ insectationis & odij irreconciliabilis, neque ita reuocari possunt quæ ante excandescente animo satis imprudenter exciderunt: honesto enim & moderato animo præditi, nihilominus facile dijudicare possunt quænam in hac tristissima controuersia Testamenti huius sententia & voluntas existat. Quemadmodum autem, qui Zuinglij doctrinam sequuntur nequaquam seducti sunt, ita etiam, Deo sit laus, neq; à Testamento hoc, neq; à quopiam alio cœlum illis præcludi potest. Iustius erat cœlum illis præcludi, qui à veritate ad mendacia sese conuertunt: pro quibus Deum oro vt clementer omnes ad id quod rectum est conuertat.

*Fucatis verbis Augustana confessioni sese ingerere.*

Porro



**P**orro autem quod quidam fratrum nobis consentientium veluti vetusta generis nobilitate clarissimus vir D. Ioannes à Lasco Polonus, & celeberrimus Theologus Ioannes Caluinus Gallus, bono animo Augustanam confessionem interpretari conati sunt, non alio nisi concordie studio ab illis factum est. Nam cum omnes profiteamur vnicum Christi Euangelium in quo consentimus, voluerunt etiam in hoc articulo Cœnæ Dominicæ vnā eandemq; confessionem efficere, & sublata omni specie dissensionis, charitatem & concordiam apud omnes plantare. Satis autem declararunt hoc suo studio humanitatis & beneuolentiæ pleno, sese nullo modo spiritu odij & contentionis, atque latrocinij obsessos esse.

Interea nemini imponere volumus, & fictam tantum ac simulatam concordiam instituere, aut nos fucatis verbis Augustanæ confessioni ingerere conamur. Idipsum enim quod credimus & docemus, simpliciter quoq; & absque omni fūco confitemur, id quod ex nostris responsionibus, Confessione nostra, & præsentī defensione manifestum est. Speramus etiam non omnes Augustanæ confessionis socios, æque atq; Testamentum hoc exacerbato animo esse contra nos nostramq; doctrinam.

Non petimus fictam concordiam.

Quinetiam si nunc quoque aliqui sint, quibus

## RESPONSIO AD

nobiscum in causa Cœnæ Domini conuenire non possit, in reliquis autem non dissentiant, his nequaquam amicitia sublata inimicitias denuntiabimus: sperantes temporis progressu, per Dei gratiam omnia meliora fore. Dissentiebant olim inter se de Baptismo beati martyres & episcopi Cornelius atque Cyprianus: dissenserunt quoque D. Hieronymus & Augustinus, non tamen propterea sese alienarunt ab inuicem, aut hostes facti sunt, sed mutuam charitatem inter se conseruauerunt. Id ipsum nos quoque parati sumus facere omnibus amantibus Euangelium Christi, & Christianæ pacis studiosis, hoc ipsum à nobis quoque libenter recipientibus.

## CONCLUSIO.

**I**N conclusione Testamenti apparet quis sit Testamenti animus, quando classicum quodammodo canit, & omnes ad arma vocat: iuuent inquit per Dei gratiam cuncti qui iuuare possunt, & qui prohibere possunt prohibeant, ne Zuinglianorum spiritus vllum locum aut sedem in Ecclesia Christi nanciscatur. Cæterum nos hanc ciferationem non tanti facimus, vt accurata responsione dignam putemus, cum ita manifesta crassus & carnalis affectus sese in hoc prodar, ac ostendat se in propria causa hære & illi diffidere, quod eam nisi publico concursu & auxilio

rueri

tueri nequeat, ideoq; turbas concitare conatur,  
Hactenus autem aperte demonstrauiamus, doctri-  
nam illam quam Testamentum hoc Zuinglia-  
num spiritum nuncupat, non aliam esse ab ortho-  
doxa veteris ecclesiæ doctrina, quam nos quoq;  
hodie retinemus: & Deum laudamus quod in  
plerisq; ecclesijs sana hæc doctrina hodie recepta  
est. Speramus autē in Deo, fore vt homines pru-  
dentes & amantes pacis, causam reipsa & recte  
expendant, semotis inquietorum hominum ho-  
stilibus instigationibus, & prolixa & inuoluta eo-  
rum garrulitate neglecta: ideoq; hanc responsio-  
nem æquissimam non spernant, neq; vna cum il-  
la reiijciant symbolum Athanasij, Augustinum ad  
Dardanum, item Chalcedonense concilium, ac  
reliqua veteris ecclesiæ testimonia ex verbo Dei  
deprompta: imo potius abiecturos confidimus  
nouam hanc corporis Christi in gloria Deifica-  
tionem & vbiquitatem, quam etiam veteres fir-  
mis rationibus improbarunt, & sic pacem nobis-  
cum & vna cum omnibus recte sentientibus con-  
seruaturos, ac precamur misericordem & beni-  
gnum Deum per vnicum Seruatorē Dominum  
nostrum Iesum Christum, vt hanc gratiam  
nobis largiatur, cui sit laus & honos  
& gloria in secula seculo-  
rum, Amen.

FINIS.